

1.2. O'quv muassasalarida badminton fanining dolzarbligi

Badminton — o'quvchilar va talabalarining umumiy jismoniy tayyorgarligini oshirish uchun juda qulay va mos sport turi hisoblanadi. Uning imkoniyatlari shu qadar kengki, bolalar 6-8 yoshdan boshlab badminton o'ynashni o'rganishlari, kattalar esa hatto 80 yoshgacha ushbu o'yinni bemaolol o'ynashlari, o'quvchilar 11 yoshdan boshlab xalqaro musobaqalarda ishtirok etishlari ham mumkin bo'ladi. Badminton nogironlarga ham tavsiya qilinadi. (1-rasm)



1-rasm

Raketka va volan bolalarni o'yin shaklida jismoniy tarbiya va sport bilan doimiy ravishda shug'ullanishga jalb etish, ularni asosiy harakat ko'nikmalari (yurish, yugurish, sakrash, zarbalar berish, o'tirib turish, hamla qilish va boshqalar)ni faol egallashga o'rgatish uchun qo'l keladi; vestibulyar apparat va sog'liqni mustahkamlashga yordam beradi. Badminton kuchli jismoniy reaksiyani rivojlantiradi, fikrlash qobiliyatini oshiradi, vaznning me'yorlashuviga yordam beradi.

Badminton katta miqdordagi moliyaviy xarajatlarni talab qilmaydi, bugungi kunda mamlakatimizdagi o'quv muassasalarida

mavjud sharoit va imkoniyatlar uni tashkil qilish uchun yetarli hisoblanadi. Badminton maydonchasi uchun istalgan maktab, kollej yoki oliy o'quv yurtining sport zalida joy bo'ladi. O'rgatish jarayoni to'g'ri tashkil etilsa, maxsus tip asosida qurilgan maktab sport zalida bir vaqtning o'zida 20 nafardan ortiq bola badminton bilan shug'ullanishi mumkin bo'ladi.

Badminton - oilaviy o'yin. Shu bois, nafaqat professional badmintonchilar yoki o'quvchilar, talabalar, balki oilalar o'rtasida ham bermalol musobaqalar tashkil etish mumkin. Shu ma'noda badminton "Otam, onam va men - sportchilar oilasi" shiori ostida o'tkaziladigan musobaqalar ruhiga juda ham mos keladi. (2- rasm)



2- rasm

Ayrimlar badmintonning ikkita kamchiligi bor, deyishadi, ya'ni: birinchidan shamol bo'layotganda ko'chada o'ynab bo'lmaydi, chunki shamol volanni uchirib ketadi, ikkinchidan bir qo'lida o'ynash kerakligi (boshqacha aytganda, assimetrik rivojlanish). Birinchi e'tirozga nisbatan shuni aytish mumkinki, butun dunyoda millionlab badminton ishqibozlari ochiq havoda intiqib o'ynashadi, hatto turli-

tuman musobaqalar ham tashkil etishadi. Assimetrik rivojlanish borasidagi fikrga nisbatan aytmoqchi bo'lganimiz, aksariyat sport turlarida (masalan, gandbol, futbol, basketbol, voleybol) ham ana shu kamchilik mavjud. Ammo zamonaviy badmintonda raketka ushlaymaydigan qo'l ham harakatda faol ishtirok etadi. U muvozanatni saqlovchi vazifasini bajaradi, oshirishda volanni o'yinga kiritib beradi, u to'g'ri rivojlantirilmasa, yaxshi o'ynashning imkoni yo'q.

Malaka, talab, modellashtirish, assimetrik, reaksiya, intensivlik, texnika, taktika, texnologiya, didaktika,